

**Innuttaasut pisortat ikiorsiissutaannik pisartagaqarnissamut Inatsisini pumasaqaataasunik naammassinnittarnersut Kommuunit tamatigut nalilersortarneraat misissorneqarnissanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuineq kingusinnerpaamik UKA2021-mi Inatsisartunut agguanneqassaaq.**

(Inatsisartuni ilaasortaq, Simigaq Heilmann, Demokraatit)

### **Akissuteqaat**

(Isumaginninnermut, Ilaqutariinnut Inatsisinillu Atuutsitsinnermut Naalakkersuisoq)

### **Siullermeerneqarnera**

Aalajangiiffigisassatut siunnersuummut soqutiginaatilimmut tassunga Naalakkersuisut qujapput.

Innuttaasut ataasiakkaat qanoq periarfissaqartiginerat malillugu innuttaasut tamarmik tapeeqataasariaqarmata Naalakkersuisut isumaqatigaat. Innuttaasut sulisinnaassusillit ilinniarsinnaasulluunniit pisortanit ikiorsiissutinik tunineqassanngillat.

Pisortanit ikiorsiissutinut aaqqissuussinnermik aaqqissuusseqqinneq Naalakkersuisut ingerlappaat 2021-imilu saqqummiunneqassalluni. Sulinerup imminut akilersinnaanissaa tunngaviunerpaajussaaq. Sulinissamut piareersimanissamut, suliffeqalernissamut ilinniarnermilluunniit aallartitsinissamut ilinniagaqarnersiutinillu pisartagalernissamut aningaasatigut tunngavissaqartariaqarpoq. Peqatigitillugu pisortanit ikiorsiissutinut aaqqissuusseqqinneq inuiaqatigiinni innuttaasunut sanngiinnerpaanut imminut pilersorsinnaanngitsunut ajutuunnginnissamut illersuutaassaaq.

Aaqqissuusseqqinneq aqutugalugu pisortanit ikiorsiissutinik pisartagaqartut nutaamik isigineqalernissaat Naalakkersuisut kissaatigaat. Innuttaasut nukissaat, innuttaasullu suliarisinnaasaat qitiutinneqassapput. Taamaammallu pisortanit ikiorsiissutinik pisartagaqartut, innuttaasut allat assigalugit, pisariaqartitsinertik naapertorlugu aamma periarfissaqartillugu, ikiuuttariaqarput.

Innuttaasut pisortanit ikiorsiissutinik pisartagaqartut suliniutinut suliffinnut qaninnerulernissamut piffissallu ingerlanerani tamakkiisumik ilaannakuusumilluunniit imminut pilersorsinnaalernissamut tapersersuiffiusunut ilaanissaat pisussaaffiuvoq. Innuttaasooq suliniutinut peqataarusunnigippat kinguneqartinneqassaaq. Suliniutit innuttaasumut sammitinneqassapput, taamaammallu kommuni innuttaasooq pillugu nalilersuiuartussaavoq. Innuttaasooq sulilernissamut piareeqqasoq pisortanit ikiorsiissutinut aaqqissuussinnermut ilaajunnaartussaavoq.

Kommunit suliffeqarfinnilu peqataasut aaqqissuusseqqinnermut atatillugu pisortanit ikiorsiissutit pisartagaqartumut pisussaaffinnik malitseqarnissaat, suliniutillu ataasiakkaanut

tapersuiffiusut ineriartortitsiffiusullu ilanngunneqartarnissaat pisariaqartinneqartut oqaatigivaat.

Naalackersuisut taamatut oqaaseqareerlutik matumuuna allannguutissatut siunnersuut imaattoq saqqummiuppaat:

"Pisortanit ikiorsiissutinik pissarsisinnaanissamut pisortanit ikiorsiissutinik pisartut qaqugukkulluunniit piumasaqaatinik equutsitsisassasut aaqqissuuseqqinnerminni piumasaqaammik ilanngussinissamut Naalackersuisut peqquneqarnissaat pillugu Inatsisartut aalajangiiffigisassaattut siunnersuut."